

ADVIS DONNE AV ROY
en son Conseil, par Monseigneur
le Prince.

*Sur l'article du tiers Estat, contradictions du
Clergé & Arrest du Parle meat, le 4.
de Ianuier mil six cens quinze.*

SIRE,
S'estime que l'affaire qui se presen-
te est vne des plus importates qui de-
puis cent ans se soit agitee en vostre
Conseil, digne de vostre presence: Il
s'agist de deux points de tresgrande
consequence: l'un regarde l'honneur
deu à Dieu, affermisement de l'Egli-
se Catholique, Apostolique, & Ro-
maine: & l'autre, la feureté & conser-
uation de vos Estats, certes, Sire, vo-
stre Maïesté se peut dire à bon droit
le plus grand Roy du monde, qui ne
releue sa Couronne que de Dieu seul
auquel tant plus vous estes puissant,

A

*dupre
not
estage*

tant plus aussi estes vous soub-mis : ce grand Dieu, Roy des Roys, à voulu pour le rachapt de nos pechez que son fils se fist homme, ce fils nous guidant de presence visible, nous a laissé vn chef visible en son Eglise Saint Pierre, duquel le Pape tient chaire & legitime succession, estant neantmoins chef de l'Eglise, Iesus Christ. Le Pape est donc Pasteur & le Premier souuerain Pontife des Brebis de Iesus-Christ, & vostre Maiesté n'estant que brebis, comme la moindre vous ne deuez doubter que ne soyez soub-mis à ceste puissance spirituelle, & pour vous acquerir salut, & pour vous retrancher & excommunier des membtres de l'Eglise, si vos fautes & pechez en donnent subiect. Ceste excommunication pour iuste cause liure vostre ame à Sathan, vous exclut de la communion de l'Eglise, de l'usage des Sacremens, mesme de

l'entree d'icelle. Mais en ce qui touche vostre temporel, subiection de vos subiects, obeissance qui vous est naturellement deuë, & sacré respect qu'il faut rendre à la conseruation de la vie del'Oing du Seigneur, la puissance spirituelle est de nul pouuoir. Que quelque vous soyez, heretique ou infidelle, on ne vous doiue obeyr en ce qui n'est que chose purement temporelle. Qu'on ne vous doiue vos tributs, ce seroit ne pas suivre les preceptes de Iesus-Christ, qui recognoist Pilate pour Iuge, qui commande de payer le Tribut à Cesar, & saint Paul y fait venir sa cause par appel, & Iesus-Christ & ce grand Apostre recourent au temporel aux iugemens & arrests des Princes Payens. Ceux qui sont ennemis de la puissance des Roys, soustenans les contraires aduis, qui ailleurs qu'en France ne se pourroient dire problematiques, n'ont ia-

mais esté si enragez que de dire qu'il
 falust tuer les Roys, au contraire, de-
 testent avec nous ceste pernicieuse as-
 sertion, & sera bien facile d'en obte-
 nir du Pape la censure. Mais ce n'est
 pas la question: venons à l'individu, &
 nous verrons que vostre sacree per-
 sonne, Sire, peut legitimement en
 quelque cas estre tuee de ses subiects
 selon leur doctrine, (Vostre Maiesté
 selon leur dire peche, on l'admone-
 ste iusques à la troisieme fois, elle con-
 tinuë, on l'excommunie, elle ne se re-
 pent, on la depose de son Royaume,
 on absout vos subiects de la fidelité
 qui vous est deuë; Lors tandis que
 Louys XIII. estoit Roy, il n'estoit pas
 permis de le tuer, mais estant deuenu
 de Roy non Roy, vn autre legitime
 prend sa place, lors continuant con-
 tre l'autorité spirituelle du Pape &
 temporelle du nouueau Roy esleu, à
 se dire Roy c'est vn vray vsuapateur,

criminel de leze Majesté diuine & humaine, & comme tel proscript, permis à tous de le tuer.) C'est donc folie de demander la censure contre ceux qui attentent contre les Roys, elle est aisée à obtenir, mais il la faut auoir entiere & seuerie contre ceste pernicieuse doctrine, qui de fillet en aiguille nous meine à vlturpations, rebellions & meurtres contre nos souuerains, de plus, mesme du consentement des Papes, nous auôs en France tenu à iamais ces maximes. Les ordonnances de S. Louys nous le monstrent suffisamment l'histoire nous remarque, que du tēps de Philippe le Bel, ce Roy s'opposa vertueusement au Pape Boniface, qui lors ayant fait vn decret, fut depuis reuocqué par son successeur au regard de nos Roys, lors tous les Euesques de France, horsmis deux, soustindrent courageusement nos maximes, & la Noblesse fit vn trait à iamais memo-

rable, escriuant au Pape, elle manda
 qu'en tout elle vouloit obeyr au Roy,
 mais que si le Roy vouloit soubs-met-
 tre au Pape sa puissance temporelle
 pour les droits de sa Couronne & suc-
 cesseurs qu'elles'y opposeroit: du téps
 de Louys XII. nous eusmes besoin de
 pareille generosité, depuis du temps
 du Roy Charles XII. en l'année mil
 cinq cens soixante & vn, Tanque-
 rel Bachelier en Theologie, ayant
 soustenu ceste damnable doctrine,
 fut par arrest de la Cour, condamné
 à faire amende honorable, & plu-
 sieurs Docteurs de Sorbonne a demã-
 der pardon au Roy. A quoy le Parle-
 ment fut lors excité par le Roy, la
 Royne sa mere, Princes de son sang,
 & Commission speciale de ce digne
 Chancelier de l'Hospital, qui lors em-
 ploya les Sceaux du Roy à exhorter
 ses Officiers à faire iustice des assassins
 des Roys. Nous deuons attendre la

mesme prudence de la Royne vostre mere, veu qu'elle a passé tant d'escueils durant sa Regence, pour vous mener au doux port de vostre Maïorité. Depuis la mort de nos deux Roys, les Clement, Guygnard, Barrière, Chastel, & Rauillac, nous donnent plus de subject qu'à aucune nation, d'exercer ceste fatale doctrine, ce sont les subiects, Sire, qui me font admirer la sagesse de vostre Parlement, qui par le tesmoignage qu'il vous rend de sa fidelité, vous oblige à iamais, & toute la France, de les estimer fidelles, courageux, & incorruptibles Magistrats, qui sont les vrais conseruateurs des saincts Decrets, & de qui il ne sort que des Oracles d'une infallible verité. Magistrats qui vous font reuerer puis-que vostre personne seule en France est exempte de leur Iurisdiction. Je ne parle que pour l'interest du Roy : car j'espere sa vie durer des

siecles, celles de Monsieur son frere de
 mesme, & par vne multitude d'enfans,
 nous nous verrons asseurez en vne
 paix perdurable. Neantmoins, Sire,
 puis-qu'en tout temps toutes rudes
 medecines ne sont bonnes, Je suis
 d'aduis d'interdire pour la consequen-
 ce du Clergé & Tiers Estat de ne plus
 disputer ceste question, & l'éuoquer à
 vous, leur laissant la liberté aux vns
 & aux autres, de mettre leurs Ar-
 ticles comme ils voudront, & lors
 que vostre Maiesté respondra les
 Cahiers, nous verrons lors par vostre
 prudence nos anciennes maximes
 confirmées par vostre responce, Et
 pource que le Clergé & la Noblesse
 pensant l'Arrest de Parlement empes-
 cher leur liberté pour le present, pour
 deciler leurs yeux: Je trouue bon d'en
 empescher par deffence la signature,
 prononciation, & publication.

F I N.